

四庫全書

子部

欽定四庫全書

冊府元龜卷一百八十五 宋 王欽若等 撰

閏位部

勲業第三

梁高祖武皇帝南齊丹陽尹順之子博學多通好籌畧
有文武才幹時流名輩咸推許之起家巴陵王南中郎
法曹行叅軍遷衛軍王儉東閣祭酒竟陵王子良開西
邸招文學帝與沈約輩號為八友累遷隨王鎮西諮議

叅軍時順之征魚復侯子響於射堂縊殺之後齊武既
憶子響順之慙懼感病遂以憂卒及鬱林王失德齊明
帝作輔將為廢立計帝欲助齊明傾齊武之嗣以雪先
恥齊明亦知之每與帝謀時齊明將追隨王恐不從又
以王敬則在會稽恐為變以問帝帝曰隨王雖有美名
其實庸劣既無智謀之士爪牙唯仗司馬垣歷生武陵
太守下白龍耳此輩唯利是與若啗以顯職無不載馳
隨王止須折簡耳敬則志安江東窮其富貴宜選美女

以娛其心齊明曰亦吾意也即徵歷生為太子左衛率
白龍游擊將軍竝至續召隨王至都賜自盡豫州刺史
崔慧景即齊武舊臣不自安齊明憂之乃起帝為寧朔
將軍鎮壽陽外聲備魏寶防慧景師次長瀨慧景待罪
白服來迎帝撫而宥之將軍房伯玉徐玄慶竝曰慧景
反跡既彰實是見賊我曹武將譬如羈上鷹將軍一言
見命便即制之帝笑曰其如掌內嬰兒殺之不武於是
曲意和釋之慧景遂安隆昌元年歷太子庶子中書黃

門侍郎入直殿省建武二年後魏遣劉昶王肅率眾寇
司州以帝為冠軍將軍軍主隸江州刺史王廣之為援
距義陽百餘里眾以魏軍盛莫敢前帝欲大振威畧謂
諸將曰今屯下梁州城塞鑿岨之險守雉脚之路據賢
首之山以通西關以臨賊壘三方犄角出其不備破賊
必矣廣之等不從後遣徐玄慶進據賢首山魏絕其糧
道眾懼莫敢援唯帝獨奮請先進於是廣之益帝精甲
啣枚夜前失道望見如持兩炬者隨之果得道徑上賢

首山廣之軍因得前魏軍來脇帝堅壁不進時王肅自
攻城二鼓而退劉昶有疑心帝因與書間成其隙一旦
有風從西北起陣雲隨之來當肅營尋而風迴雲轉向
西北帝曰此所謂歸氣魏師遁矣令軍中曰望麾而進
聽鼓而動肅乃傾壁十萬陣水北帝揚麾鼓譟響振山
谷效死之士執短兵先登長戟翼之城中見援至因出
軍攻魏柵魏軍表裏受敵因大敗肅昶單馬走斬獲千計
流血滿野得肅昶巾箱中魏帝勅曰聞蕭衍善用兵勿

與爭鋒待吾至若能擒此人則江東吾有也軍罷以帝
為右軍晉安王司馬淮陵太守遷太子中庶子領羽林
監頃之出鎮石頭四年魏帝自率大衆寇雍州明帝令
帝赴援十月至襄陽詔又遣左民尚書崔慧景總督
諸軍帝及雍州刺史曹武等並受節度五年三月慧景
與帝進行鄧城魏主率十萬餘騎奄至慧景失色欲引
退帝固止之不從乃狼狽自拔魏騎乘之於是大敗帝
獨率衆距戰殺數千百人魏騎稍却因得結陣斷後至

夕得下船慧景軍死傷畧盡唯帝全師歸俄以帝行雍
州事七月授持節都督雍梁南北秦四州郢州之竟陵
司州之隨郡諸軍事輔國將軍雍州刺史其年東昏即
位揚州刺史始安王遙光尚書令徐孝嗣尚書右僕射
江祐侍中江祀衛尉劉暄更直內省分日帖勅帝聞之
謂從舅張弘策曰政出多門亂其階矣詩云一國三公
吾誰適從況今有六而可得乎嫌隙若成方相誅滅當
今避禍唯有此地勤行仁義可坐作西伯諸弟在都恐

罹世患須與益州圖之耳時帝長兄懿罷益州還仍行
郢州事乃使張弘策詣郢陳計於懿曰昔晉惠庸主諸
王爭權遂內難九興外寇三入今六貴爭權人握王憲
制主畫勅各欲專威睚眦成憾屢相屠滅且嗣主在東
宮本無令譽媒近左右蜂目恐人一總萬機恣其所欲
豈肯虛坐主諾委政朝臣積相嫌貳必大誅戮始安欲
為趙倫形迹已見蹇人上天信無此理且性甚猜狹徒
取亂基所可當輔唯有江劉而已祐怯而無斷暄弱而

不才折鼎覆餗翹足可待蕭坦胸懷猜忌動言相傷徐
孝嗣才非柱石聽人穿鼻若隙開釁起必中外土分今
得守外藩幸圖身計智者見機不俟終日及今猜防未
生宜召諸弟以時聚集後相防疑投足無路郢州控帶
荆湘西注漢沔雍州士馬呼吸數萬虎視其間以觀天
下世治則竭誠本朝世亂則為國剪暴可得與時進退
此蓋萬全之策如不早圖悔無及矣懿聞之變色心未
之許弘策還帝乃啓迎弟偉及憺是歲至襄陽於是潛

造器械多伐竹木沈於檀溪密為舟裝之備永元二年冬懿被害信至帝密召長史王茂中兵呂僧珍別駕柳慶遠功曹史吉士瞻等謀之既定以十一月乙巳僚佐集於廳事謂曰昔武王會孟津皆曰紂可伐今昏主惡稔窮虐極暴誅戮朝賢罕有遺育生民塗炭天命殛之卿等同心疾惡共興義舉公侯將相良在今日各盡勲効我不食言是日建牙於是收得甲士萬人馬千匹船三千艘出檀溪竹木裝艦先是東昏以劉山陽為巴陵

太守配精兵三千使過荊州就行州事蕭穎胄以襲襄陽帝知其謀乃遣叅軍王天虎龐慶國詣江陵徧與州府人書及山陽西上帝謂諸將曰荊州本畏襄陽人如唇亡齒寒自有傷弦之急寧不閤同邪我若總荆雍之兵掃定江夏韓白重出不能為計況以無算之昏主役御應勅之徒哉我能使山陽至荆便即授首諸君試觀何如及山陽至巴陵帝復令天虎齎書與穎胄兄弟去後帝謂張弘策曰夫用兵之道攻心為上攻城次之心

戰為上兵戰次之今日是也前遣天虎往州府人皆有書今改乘驛甚急只有二封與行事兄弟云天虎口具及問天虎而口無所說行事不得相聞不容妄有所道天虎是行事心膂彼聞必謂行事與天虎共隱其事必人人生疑山陽惑於衆口判相嫌貳則行事進退無以明必漏吾謀是馳兩空函定一州矣山陽至江安聞果疑不上穎胄大懼乃斬天虎送首山陽信之將數十人馳入穎胄伏甲斬之送首於帝仍以南康王尊號之議

來告且曰時月未利當須來年二月據便進兵恐非廟
筭帝答曰今坐甲十萬糧用自竭況所籍義心一時驍
銳事事相接猶恐疑怠頓兵旬必生悔吝兒童立異
便大事不成今太白出西方仗義而動天時人謀有何
不利處分已定安可中息昔武王伐紂行逆太歲復須
待年月乎竟陵太守曹景宗遣杜思沖勸帝迎南康都
襄陽待正尊號然後進軍帝不從王茂又私於張弘策
曰我奉事節下義無進退今者以南康置人手中彼便

挾天子以令諸侯而節下前去為人所使此豈歲寒之計弘策言之帝曰若使前途大事不捷故自蘭艾同焚若功業克建威讐四方號令天下誰敢不從豈是碌碌受人處分至石城當面曉王茂曹景宗也於沔南立新野郡以集新附二年二月南康王為相國以帝為征東將軍給鼓吹一部戊申帝發襄陽留弟偉守襄陽城總州府事憺守壘城府司馬莊丘黑守樊城功曹史吉士詢兼長史白馬戍主黃嗣祖兼司馬郡令杜永兼別駕

少府錄事郭儼知轉漕移檄京邑曰夫道不常夷世無
永治險泰相沿晦明非一皆因屯困而復亨資多難以
啓聖故昌邑悖德孝宣聿興海西亂政簡文升歷並拓
緒開基紹隆保命理驗前經事昭往策獨夫擾亂天常
毀棄君德姦回淫縱歲月滋甚挺虐於鬢剪之年植險
於髻州之日猜忌凶毒觸途而著暴戾昏荒與事而發
自大行告漸喜容見前梓宮在殯覲無哀色懼娛遊宴
有過平常奇服異衣更極夸麗至於選採妃嬪姊妹無

別招侍巾櫛姑姪莫辨掖庭有稗販之名姬姜被干父
之服至乃形體宣露褻衣顛倒斬斮其間以為懽笑騁
肆淫放驅屏郊邑老弱波流士女途炭行產盈路輿尸
竟道母不及抱子不遑哭劫掠剽虜以日繼夜晝伏宵
遊曾無休息沉浮酣營縱歌墟邸寵恣愚豎亂惑妖孽
梅虫兒茹法珍臧獲廝小專制威柄誅剪忠良屠滅卿
宰劉鎮軍舅氏之尊盡忠報國江僕射外戚之重竭誠
事上蕭領軍葭莩之宗志存柱石徐司空沈僕射縉紳

冠冕民望攸歸或渭陽餘感或勲庸允摯或誠著艱難
或勤勞王室並受遺託同參顧命送往事居俱竭心力
宜其慶溢當年祚隆後裔而一朝薨粉孩稚無遣人神
怨結行路嗟憤蕭令公幹世之才識貫幽顯往年冠賊
遊魂南鄭危逼拔公飛泉孤城獨振及中流逆命憑陵
京邑謀猷禁省指授羣帥剋剪鯨鯢清我王度崔慧景
奇鋒迅駭兵交象魏武士喪魂義夫奪膽投名送款比
屋交馳負糧景從愚智競赴復誓旅江甸奮不顧身獎

勵義徒電掩強敵克殲大憝以固皇基功出桓文道過
伊呂而勞謙省已事昭心迹功遂身退不祈榮滿敦賞
未聞禍酷遒及預稟精靈孰不寃痛而羣孽放命蜂蠆
懷毒乃遣劉山陽驅扇逋逃招逼亡命潛圖密構規見
掩襲蕭右軍夏侯征虜忠斷夙舉義形於色奇謀宏振
應手梟懸天道禍淫罪不容戮悖禮違教傷化虐民射
天彈路比之猶善剗胎斮腦方之非酷盡寓縣之竹未
足紀其過窮山澤之鬼不能書其罪自草昧以來圖牒

所紀昏君暴后未有若斯之甚者也既人神之主宗社
阡危海內沸騰士庶波蕩百姓懍懍如摧厥角蒼生喁
喁投足無地幕府荷眷前朝義均休戚上懷委付之重
下惟在原之痛豈可臥薪引火坐觀傾覆至尊體自高
宗特鍾慈寵明並日月粹照神靈祥啓元龜符驗當璧
作鎮侯藩化流西夏謳歌攸奉萬有樂推右將軍穎胄
征虜將軍夏侯祥並同心翼戴即宮舊楚三靈再朗九
縣更新升平之運此焉復始康哉之盛在乎茲日然帝

德雖彰區宇大定元惡未黜天邑猶梗仰稟宸規率前
啓路即日遣冠軍將軍竟陵內史曹景宗等率二十軍
主長檣五萬驥騾為羣鴉視爭先龍驤並驅步出橫江
直指朱雀長史冠軍將軍襄陽太守王茂等率三十軍
主戈船七萬乘流電激摧鋒拒險斜趣白城南中郎諮
議叅軍蕭偉等三十九軍主巨艦迅楫衝波噓水旗鼓
八萬焱集石頭南中郎諮議叅軍軍主蕭憺等四十二
軍主熊羆之士甲楯十萬沿波馳艤掩據新亭益州刺

史劉季連梁州刺史柳惔司州刺史王僧景魏興太守裴
師仁上庸太守韋叡新城太守崔僧季肅奉明詔恭行
天討蜀漢果銳沿流而下淮汝勁勇望波遙驚幕府總
率貔貅驍勇百萬繕甲燕弧屯兵冀馬擬金沸地鳴鞭
聒天霜鋒曜日朱旗絳寓方舟千里絡繹繼進蕭右軍
討謨上才兼資文武英略峻遠執鈞輔世擁荆南之衆
董四方之師宣讚中權奉衛輿輦旌旄所指威稜無外
龍驤虎步並集建業黜放愚狡均禮海昏廓清神甸掃

定京宇譬猶摧太山而注燐燼豈有不殄滅者哉今資
斧所加止虫兒法珍而已諸君或世胄羽儀書勲王府
皆俛眉姦黨受制匈奴威若能因變立功轉禍為福並誓
河岳永紆青紫若執迷不悟拒逆王師大衆一臨刑茲
罔赦所謂火烈高原芝蘭同泯勉求多福無貽後悔賞
罰之科有如白水帝至竟陵命長史王茂與太守曹景
宗為前軍中兵參軍張法安守景陵城茂等至漢口輕
兵濟江逼郢城其刺史張沖置陣據石橋浦義師與戰

不利軍主朱僧起死之諸將議欲併軍圍郢分兵襲西陽武昌帝曰漢不關一里箭道交至房僧寄以重兵固守為郢城犄角若悉衆前進賊必絕軍後一朝為阻則悔無及今欲遣王曹諸軍濟江與荊州軍相併以逼賊壘吾自後圍魯山以通沔漢郢城竟陵間乘方舟而下江陵湘中之兵連旗接办資糧既廣士衆稍多圍守兩城不攻自拔天下之事臥取之耳諸將皆曰善乃命王茂曹景宗帥衆濟岸進頓九里其日張沖出軍迎戰茂

等邀擊大破之皆棄甲奔走荊州遣冠軍將軍鄧元起
軍主王世興田安等數千人會大軍於夏首帝築漢口
城以守魯山令水軍主張惠紹朱思遠等遊遏江中絕
郢魯二城三月乃命元起進軍南堂西渚田安之頓城
北王世興頓曲水故城是月南康王即帝位於江陵改
元為中興元年遙廢東昏為涪陵王以帝為尚書左僕
射加征東將軍都督征討諸軍事假黃鉞西臺又遣冠
軍將軍蕭穎達領兵會於軍四月帝出沔命王茂蕭穎

達等進軍逼郢城元嗣屢戰頻北因不敢出諸將議欲
攻之帝不許五月東昏遣寧朔將軍吳子陽軍主光子
衿等三十軍救郢州進據巴口六月西臺遣衛尉席闢
文勞軍齊蕭穎胄等議謂帝曰今頓兵兩岸不併軍圍
郢定西陽武昌取江州此機已失莫若請救於魏與連
和猶為上策帝謂闢文曰漢口路通荆雍控引秦梁糧
運資儲聽此氣息所以兵壓漢口連給數州今日併軍
圍城又分兵前進魯山必阻沔路所謂搯喉若糧運不

通自然離散何謂持久鄧元起近欲以三千兵往定尋陽彼若懼然悟機一酈生亦足脫拒王師故非三千能下進退無據未見其可西陽武昌取便得耳取得便應鎮守守兩城不減萬人糧儲稱是卒無所出脫賊軍有上者萬人攻一城兩城勢不能相救若我分軍應援則首尾俱弱如其不遣孤城必陷一城既沒諸城相次土分天下大事於是去矣若郢州既被席卷沿江西陽武昌自然風靡何遽分兵散衆自貽其憂且丈夫舉動言

靜天步況擁數州之兵以誅羣豎懸河注火奚有不滅
豈容北面請救以自示弱彼未必能信徒貽我醜聲此
之下計何謂上策卿為我白鎮軍前途攻取但以見付
事在目中無患不捷借鎮軍靜鎮之耳吳子陽等進軍
武昌帝乃命軍主梁天惠蔡道祐據漁湖城唐修期劉
道曼屯白陽壘夾兩岸而待之子陽又進據加湖去郢城
三十里傍山帶水築壘柵以自固魯山城主房僧寄死
其衆復推助防張樂祖代之七月帝命王茂帥軍王曹

仲宗康絢武會超等潛師襲加湖將逼子陽水涸不通
艦其夜暴長衆軍乘流齊進鼓噪之賊俄而大潰子陽
等竄走衆盡溺於江王茂虜其餘而旋於是郢魯二城
相視奪氣先是東昏遣冠軍將軍陳伯之鎮江州為子
陽等聲援帝乃謂諸將曰夫征討未必須實力所聽威
聲耳今加湖之敗誰不弭服陳虎牙乃伯之子狼狽奔
歸彼間人情理當恟懼我謂九江傳檄可定也因命搜
所獲俘囚得伯之幃主蘇隆之厚加賞賜使致命焉魯

山城主張樂祖郢城主程若薛元嗣相繼請降初郢城之間將佐文武男女口十餘萬人疾疫流腫死者十七八及城開帝並加隱恤其死者命給棺槨先是汝南人胡文超起義於潁陽求討義陽安陸等郡以自効帝又遣軍主唐修期攻隨郡並克之司州刺史王僧景遣子貞孫入質司部悉平陳伯之遣蘇隆反命求便進軍帝曰伯之此言意懷首鼠及其猶豫急往逼之計無所出勢不得異乃命鄧元起帥衆即日沿流討之八月天子遣

兼黃門郎蘇因勞軍帝至鄧州命諸軍以次進路留上
庸太守韋叡守郢城行州事鄧元起至尋陽陳伯之猶
猜懼乃收兵退保湖口留其子虎牙守湓城及帝至乃
束甲請罪九月天子詔帝平定東夏並以便宜從事是
月留少府長史鄭紹叔守江州前軍次蕪湖南豫州刺史
申胄棄姑熟走大軍追據之仍遣曹景宗蕭穎達領馬
步進頓江寧東昏遣征虜將軍李居士帥步軍迎戰景
宗擊走之於是王茂鄧元起呂僧珍進據赤鼻邏曹景

宗陳伯之為遊兵是日新亭城主江道林率兵出戰衆軍擒之於陣大軍次新林命王茂據越城景宗據皂莢橋鄧元起據道士墩陳伯之據離門道林餘衆退屯航南議軍迫之因復散走退保朱雀憑淮以自固時李居士猶據新亭壘請東昏燒南岸邑屋以開戰場自大江以西新亭以北蕩矣十月東昏石頭軍主朱僧勇率水軍二千人歸降東昏又遣征虜將軍王珍國帥軍主胡虎牙等列陣於航南大路悉配精手利器尚十餘萬人

閹人王張子持白虎幡督帥諸軍又開航背水以絕歸路王茂曹景宗等犄角奔之將士皆殊死戰無不一當百鼓噪震天地珍國之衆一時土分投淮死者積尸與航等後至者乘之以濟於是朱雀諸軍望之皆潰散義軍追至宣陽門李居士以新亭壘徐元瑜以東府城降石頭白下諸軍並宵潰壬午帝鎮石頭命衆軍圍六門東昏悉焚燒門內驅逼營署官府並入城有衆二十萬青州刺史桓和紿東昏出戰因以其衆來降帝命諸軍

築長圍初義師之逼東昏遣軍主左僧慶鎮京口常僧
景鎮廣陵李叔獻屯瓜步及中冑自姑熟奔歸又使屯
破墩以為東北聲援至是帝遣使曉喻並率衆降乃遣
弟輔國將軍秀鎮京口輔國將軍憺屯破墩從弟寧朔
將軍景鎮廣陵吳郡太守蔡寅棄郡赴義十二月丙寅
旦兼衛尉張稷北徐州刺史王珍國斬東昏送義師帝
命呂僧珍勒兵封府庫及圖籍收嬖妾潘妃及凶黨王
咥之以下四十八人屬吏誅之宣德皇后令追廢涪陵

王為東昏侯依漢海昏侯故事授帝中書監都督揚南
徐二州諸軍事大司馬錄尚書驃騎大將軍揚州刺史
封建安郡開國公邑萬戶給班劔四十人依晉武陵王
遵承制故事百僚致敬三年正月壬寅詔進大司馬都
督中外諸軍事劔履上殿入朝不趨贊拜不名加前後
部羽葆鼓吹置左右長史司馬從事中郎掾屬各四人
并依舊辟士餘並如故甲寅詔大司馬進位相國總百
揆揚州牧封十郡為梁公詔曰夫日月麗天高明所以

表德山岳紀地柔博所以成功故能廢物出而資始河
海振而不洩二象貞觀代之者人是以七輔四叔致無
為於軒昊韋彭齊晉靖衰亂於殷周大司馬有縱自天
體茲濟聖文治九功武包七德欽惟厥始微猷早樹誠
著艱難功參帷幕錫賦開壤式表厥庸建武升歷邊隙
屢啓公釋書輟講經營四方司豫懸切樊漢危殆覆強
冠於汭濱僵胡馬於鄧洊永元肇號難結羣醜專威擅
虐被毒含靈溥天惴惴命懸晷刻否終有期神謨載挺

首建大策惟新鼎祚投袂勤王沿流電舉魯城雲散夏
首霧披加湖羣盜一鼓殄拔姑熟連旌脩馬冰泮取新
壘其如拾撲朱雀其猶掃霆雷外駭省闈內傾餘醜纖
蠹蜚螻必盡援彼已溺解此倒懸塗歡里忭自近及遠
畿甸夷穆方外肅寧解茲虐紐被以寬政積弊窮昏一
朝載廓聲教遐漸無思不被雖伊尹之執茲一德姬旦
之光於四海方斯蔑如也昔呂望翼佐聖君猶享四履
之命文侯立功平后尚荷二弓之錫况於盛德元勲超

邁自古黔首惴惴待以為命救其已焚拯其方溺式閭
表墓未或能比而大輅渠門輟而莫授眷言前訓無忘
終始便宜敬升大典式允羣望其進位相國總百揆揚
州牧封十郡為梁公備九錫之禮加璽綬遠遊冠位在
諸王上加相國綠綬綬其驃騎大將軍如故依舊置梁
百司策曰二儀寂寞由寒暑而代行三才並用資立人
以為寶故能流行品物代彼天工允茲元輔應期挺秀
裁成天地之功幽協神明之德撥亂反正濟世寧民盛

烈光於有道茂勲振於無外雖伊陟之保乂王家姬公
之有此丕訓方之蔑如也今將授公典策其敬聽朕命
上天不造難鎮皇室世祖以休明早世世宗以仁德不
嗣高宗襲統宸居弗維夙夜勤勞而隆平不洽嗣君昏
暴書契弗觀朝權國柄委之羣孽勦戮忠賢誅殘台輔
含冤抱痛嗟類靡餘實繁非一並專國命頻笑致災眚
眦及禍嚴科毒賦載離比屋溥天熬熬寘身無所冤頸
引決道樹相望無近無遠號天靡告公籍昏明之期因

兆民之願援帥聖后翊成中興宗社之危已固天人之
望允塞此實公紐我絕綱大造皇家者也永明季年邊
隙大啓荆河連牽招引戎荒江淮擾逼勢同履虎公受
言本朝輕兵赴襲縻以長筭制之環中排危冒險彊柔
遞用坦然一方還成藩服此又公之功也在昔隆昌洪
基已謝高宗慮深社稷將行權道公定策帷帳激揚大
節廢帝立王謀猷深著此又公之功也建武闡業厥猷
雖遠戎狄內侵憑凌關塞司部危逼淪陷指期公治兵

遠討卷甲長驚拒於交綏電激風掃摧堅覆銳咽水塗
原執俘象魏獻馘海渚焚廬毀帳號哭言歸此又公之
功也樊漢貼切羽書續至公星言鞠旅稟命徂征而軍
機戎統事非已出善策嘉謀抑而莫允鄧城之役胡馬
卒至元帥潛及不相報告棄甲捐師餌之虎口公南收
散卒北禦雕騎令衆方軌案路徐歸拯我邊危重獲安
堵此又公之功也漢南迴弱咫尺勁寇兵糧蓋闕棄甲
靡遺公作藩爰始因資靡託治兵訓卒蒐狩有序俾我

危城翻為彊鎮此又公之功也永元紀號膽烏已及雖
廢昏有典而伊霍稱難公首建大策爰立明聖義踰邑
綸勲高代入易亂以治俾昏作明此又公之功也文王
之功雖被江漢京邑蠢蠢漂為洪流句吳於越巢幕匪
喻公投袂萬里事惟拯溺義聲所覃無思不遑此又公
之功也魯城夏汭梗據中流乘山置壘紫川自固公御
此烏集陵茲地險頓兵坐甲寒往暑移我行永久士忘
歸願經以遠圖御以長策費無遺矢戰未窮兵踐華之

固相望俱拔此又公之功也惟此羣公同志相濟緣江
負險蟻聚加湖水陸盤據規援夏首桴旂一臨應時褫
潰此又公之功也姦孽震惶復懷舉斧蓄兵九派用擬
勤王公稜威直指勢喻風電旌旆未臨全州稽服此又
公之功也姑熟衝要密通京畿凶徒熾聚斷塞津路公
偏師啓塗排方繼及兵威所震望旗自駭焚舟委壁卷
甲宵遁此又公之功也羣豎猖狂志在借一
左傳云背城借一借
戰也一豕突淮涘武騎如雲公爰命英勇圖機騁銳氣冠

陂泉勢踰洹水追奔逐北奄有通津熊耳比峻未足云
擬睢水不流曷其能匹此又公之功也琅琊石首襟帶
岨固親壘東庸金湯是埒憑險作守兵食兼資風激電
駭莫不震疊城復于隍於是乎在此又公之功也獨夫
昏狠憑城靡懼鼓鐘鎗鞞傲若有餘狎是邪孽忌斯冠
冕旬旻因之將逞孥戮公竒謨密運盛畧潛廻忠勇之
徒得申厥效白旗宣室未之或比此又公之功也公有
拯億兆之勲重之以明德爰初勵志服道儒門濯纓來

仕清猷映世時運艱難宗稷危殆崑崗已燎玉石同焚
驅率貔貅抑揚霆電義等南巢功齊牧野若夫禹功寂
寞微管誰嗣拯其將魚驅其被髮解茲亂網理此芬絲
復禮社席返樂河海永平故事聞之者歎息司隸舊章
見之者隕涕請我民命還之斗極憫憫縉紳重荷戴天
之慶哀哀黔首復蒙履地之恩德踰嵩岱功隣造物超
哉邈矣無得而言焉朕又聞之疇庸命德建侯作屏咸
用克固四維永隆萬業是以二南流化九伯斯征王道

淳洽刑措罔用霸政弗興歷之永久如燬既及晉鄭靡
依惟公經綸天地寧濟區夏道冠乎伊稷賞薄於桓文
豈所以憲章齊魯長燮宇宙敬惟前烈朕甚懼焉今進
授相國改揚州刺史為牧以豫州之梁郡歷陽南徐州
之義興揚州之淮南宣城吳興會稽新安東陽十郡封
公為梁公錫茲白土苴以白茅爰定爾邦建茲冢社在
昔旦奭入居保佐逮於畢毛亦作卿士任兼內外禮實
宜之今命使持節兼太尉王亮授相國揚州牧印綬梁

公璽紱使持節兼司空王志授梁公茅土金虎符等第一至第五左竹使符第一至第十左相國位冠羣后任總百司常典藝數宜與事革其以相國總百揆去錄尚書之號上所假節侍中貂蟬中書監印中外都督大司馬印綬建安公印策驃騎大將軍如故又加公九錫其敬聽後命以公禮律兼修刑德備舉哀矜折獄罔不用情是用錫公大輅戎輅各一玄牡二駟公勞心稼穡念在民天丕崇務本惟穀是寶是用錫公充冕之服赤舄副焉

公鎔鈞所被變風以雅易俗陶民載和邦國是用錫公
軒懸之樂六佾之舞公文德廣覃義聲遠洽椎髻髻首
夷歌請吏是用錫公朱戶以居公揚清抑濁官方有序
多士聿興棧樸流詠是用錫公納陛以登公正色御下
以身範物式遏不虞折衝惟遠是用錫公虎賁之士三
百人公威同夏日志清姦宄方命圯族刑茲罔赦是用
錫公鈇鉞各一公跨躡嵩溟凌厲區宇辟諸日月容光
必至是用錫公彤弓一彤矢百旅弓十旅矢千公永言

惟孝至誠通神恭嚴祀典祭有餘敬是用錫公鉅宅一
旨圭瓚副焉梁國置丞相以下一遵舊式欽哉其敬循
往策祇服大禮對揚天眷用膺多福以弘我太祖之休
命梁公固辭府僚勸請乃受二月丙戌詔曰嵩高惟嶽
配天所以流稱大啓南陽霸德所以光闡忠誠簡帝蕃
君膺上爵之尊勤勞王室姬公增附庸之地前王令典
布諸方策長世字民罔不繇此相國梁公體茲上哲齊
聖廣淵文教內洽武功外暢推轂作藩則威懷被於殊

俗治兵教戰則雷霆赫於萬里道喪時昏邪說孔熾豈
徒宗社如綴神器莫主而已哉至於北庭殲亡衣冠殄
滅餘類殘喘指命崇朝含生業業投足無所遂乃山川
反覆草木塗地與夫仁被行葦之時信及豚魚之日何
其遼曼相去之遠歟公命師鞠旅指景長驚而本朝危
切樊鄧遐遠凶徒盤據水陸相望爰自姑熟屈於夏首
嚴城勁卒憑川為固沿漢浮江電激風掃舟徒水覆地
險雲傾藉茲義勇前無強陣拯危京邑清我帝畿撲既

燎於原火免將誅於比屋悠悠兆庶命不在天茫茫六合咸受其賜易俗正本民不失職仁信並行禮樂同暢伊周未足方軌桓文遠有懋德而爵後藩牧地約秦楚非所以式酬茂烈允答元勲寶繇公履謙為本形於造次加數未申晦朔增佇便宜崇斯禮秩允副遐邇之望可進梁公爵為王以豫州之南譙廬江江州之尋陽郢州之武昌西陽南徐州之南琅瑯南東海晉陵揚州之臨海永嘉十郡益梁國并前為二十郡其相國揚州牧

驃騎大將軍如故公固辭有詔斷表相國左長史王營
等率百僚敦請三月丙午命王冕十有二旒建天子旌
旗出警入蹕乘金根車駕六馬備五時副車置旄頭雲
罕樂舞八佾設鐘虡宮懸王妃子王女爵命之號一依
舊儀四月丙寅遂受齊禪即皇帝位

世祖元皇帝武帝第七子天監十三年封湘東王邑二
千戶初為會稽太守入為侍中宣威將軍丹陽尹普通
七年出為使持節都督荆湘郢益寧南梁六州諸軍事

西中郎將荊州刺史中大通四年進號平西將軍大同元年進號安西將軍三年進號鎮西將軍五年入為護軍將軍領石頭戍軍事六年出為使持節都督江州諸軍事鎮南將軍江州刺史太清元年徙為使持節都督荊雍湘司郢寧梁南北秦九州諸軍事鎮西將軍荊州刺史三年三月侯景寇沒京師四月太子舍人蕭歆至江陵軍密詔以帝為侍中假黃鉞大都督中外諸軍事司徒承制是月帝徵兵於湘州刺史河東王譽憚所遣七

月丙午遣世子方等帥衆討譽方等戰敗死又遣鎮兵將軍鮑泉代之九月乙卯雍州刺史岳陽王譽舉兵反來寇江陵帝嬰城拒守乙丑譽將杜弼與其兄弟及楊混各率其衆來降丙寅譽遁走鮑泉攻湘州不克又遣

左衛將軍王僧辯代將四年

臣欽若等曰是歲簡文即位改元大寶而元帝猶稱

大清五月辛未僧辯克湘州斬河東王譽湘州平六月江

夏王大款山陽王大成宜都王大封自信安間道來奔九月辛酉以前郢州刺史南平王恪為中衛將軍王僧

辯為領軍是月侯景將任約寇西陽武昌遣左衛將軍
徐文盛右衛將軍陰子春太子右衛率蕭慧正雋州刺
史席文獻等下武昌拒約以南平王恪為荊州刺史鎮
武陵十一月甲子恪及大款大成等府州國一千人奉
牋上帝相國總百揆帝下令不許十二月壬辰以定州
刺史蕭勃為鎮南將軍廣州刺史遣護軍將軍尹悅巴
州刺史王珣定州刺史杜多安帥衆下武昌助徐文盛
五年三月侯景悉兵西上會任約軍閏四月丙午約與

宋子仙襲郢州執方諸戊申徐文盛陰子春等奔歸王珣
尹悅杜多安並降賊庚戌領軍將軍王僧辯帥衆屯巴陵
甲子景進寇巴陵五月癸未帝遣遊擊將軍胡僧祐信州
刺史陸法和帥衆下秣陵任約敗景遂遁走拜王僧辯為
征東將軍開府儀同三司尚書令胡僧祐為領軍陸法和
為護軍將軍仍令僧辯率衆追景所至皆捷八月僧辯下
次湓城九月以僧辯為荊州刺史是月僧辯等奉表勸請
不許賊司空東南道大行臺劉神茂率儀同劉歸義劉冀

赴義奉表請降六年二月僧辯衆軍發自尋陽帝馳檄告
四方曰夫剥極生災乃及龍戰師貞終吉方制積豕豈不
以侵陵蕩溥源之者亂階龕定艱難成之者忠義故羿澆
滅於前莽卓誅於後是故使桓文之勲復興於周代溫陶
之績彌盛於金行粵若梁興五十餘載平一寓內德惠悠
長仁育蒼生義征不服左伊右瀝咸皆仰化濁涇清渭靡
不向風建翠鳳之旗則六龍驤首擊靈鼉之鼓則百辟警
肅風牧方邵之賢衛霍辛趙之將羽林黃頭之士虎賁緹

騎之夫叱咤則風雲興起鼓動則嵩華倒拔自桐栢以北
孤竹以南碣石之前流沙之後延頸舉踵交臂屈膝胡人
不敢牧馬秦士不敢彎弓叶和萬邦平章百姓十堯九舜
曷足云也賊臣侯景匈奴叛臣鳴鏑餘噍懸瓠空城本非
國寶壽春畿要賞不踰月開海陵之倉賑常平之米撒九
府之費錫三宮之錢冒于貨賄不知紀極敢興逆亂梗
我王畿賊臣正德阻兵安忍日者結怨江芊遠適單于
簡牘屢彰彭生之魂未弭聚斂無度景卿之誚已及為

虎傳翼遠相招致虔劉我生民離散我兄弟我是以董
率臯貌躬擐甲冑霜戈炤日則晨離奪暉龍騎蔽野則
平原掩色信與江水同流氣與寒風俱憤凶醜畏威委
命下吏乞活淮汜苟存徐兗渙汗既行絲綸爰被我是
以班師凱歸休牛息馬城猶不悛遂復矢流玉屋兵纏
象魏總章之觀非復聽訟之堂甘泉之宮永乖避暑之
地坐召憲司臥制朝宰矯託天命僞作符書重增賦斂
肆意掊尅生者逃竄死者暴尸道路以目庶僚鉗口刑

戮失衷爵賞繇心老弱波流士女塗炭臧獲之人五宗
及賞縉紳之士三族見誅穀粟騰踊自相吞噬喋喋黔
首路有啣索之哀蠢蠢黎民家有隕山之泣偃師南望
無復儲胥露寒河陽北臨或有穹廬羶帳南山之竹未
足言其愆西山之兎不足書其罪外監陳瑩之伏承先
帝登遐宮車晏駕奉諱驚號五內摧裂煩冤荼毒無地
容身景阻饑既甚民且狼顧遂侵軼我彭蠡憑陵我郢
邑竊據我江夏掩襲我巴丘是以義勇爭先忠貞盡力

斬馘兇渠不可稱
筭沙同赤岸水似絳河
任約泥首於安南
化仁面縛於漢口子
仙乞活於鄢郢希榮
敗績於柴桑侯景奔
竄十鼠爭穴郭默清
夷晉熙附義計窮力
屈反殺生人畢原鄴
並離禍患凡蔣邢茅
皆伏鈇鑕是可忍也
孰不可容幕府據有
上流實惟分陝投袂
荷戈志在畢命昔周
依晉鄭漢有虛年彼
惟末屬猶能如此况
聯華日月天下不能
為臣為子兼國兼家
哉咸以義旗既建宜
須總一共推幕府實
用主盟粵以不佞謬


董連率遠惟國艱不遑寧處中權後勁龔行天罰提戈
蒙險隕越以之天馬千羣長戟百萬驅賁獲之士資智
勇之力大楚踰荆山淺源度彭蠡觸艫汎水以倚其南
輜輶委輸以衝其北華夷百濮羸糧景從雷震風駭直
指建業按劔而叱江水為之逆流抽戈而揮皎日為之
還舍方駕長驅百道俱入夷水殄谷充原蔽野挾輶曳
牛之侶拔距礮石之夫騎則逐日追風弓則吟猿落鴈
捧崑崙而壓卵傾渤海而灌熒如駟馬之載鴻毛若奔

牛之觸魯縞以此衆戰誰能禁之脫復蜂蟄有毒獸窮則鬪謂山蓋高則四郊多壘謂地蓋遠則三千弗逮如彼怒蛙譬諸鼯鼠豈費萬鈞無勞百鎰加以日臨黃道兵起絳宮三門既啓五將咸發齊正正之旗掃亭亭之氣故以臨機密運非賊所解奉義而誅何罪不服今遣使持節大都督征東將軍開府儀同三司江州刺史尚書令長寧縣開國侯王僧辨率衆十萬直掃金陵鳴鼓聒天擬金震地朱旗夕建如赤城之霞起戈船夜動若

滄海之奔流計其同惡不盈一旅君子在野小人在位
朋黨比周何校滅耳匪朝伊夕春長狄之喉繫郅支之
頸今司寇明罰鈇鑕所誅止侯景而已黎元何辜一無
所問諸君或世樹忠貞身荷寵爵羽儀鼎族書勲王府
俛眉猾豎無繇自効豈不下慙泉壤上愧皇天失忠與
義難以自立想誠南風廼瞻西顧因變立功轉禍為福
有能縛侯景及送首者封萬戶開國公絹布五萬疋有
能率勤義衆以應官軍保全城邑不為賊用上賞方伯

下賞剖符並裂山河以紆青紫昔繇余入秦禮同卿佐
日磬降漢且珥金貂必有具才何恤無位若執迷不反
拒逆王師大軍一臨刑茲罔赦孟諸焚燎芝艾俱盡宣
房河決玉石同沉信賞之科有如皎日黜陟之制事均
白水檄布遠近咸使知聞三月王僧辨等平侯景傳其
首於江陵戊子以賊平告明堂大社己丑僧辨等又奉
表勸進不許五月庚午司空平南王恪及宗室王侯大
都督王僧辯等復拜表上尊號帝固讓不受庚辰以恪

為鎮東將軍揚州刺史僧辯為司徒鎮東將軍乙酉斬
賊左僕射王偉尚書呂季畧少卿周石珍舍人嚴實於
江陵市十月四方征鎮王公卿士復勸帝即尊號表三
上從之十一月丙子即皇帝位



冊府元龜卷一百八十五

欽定四庫全書

子部

冊府元龜卷一百八十六

詳校官中書_臣涂日煥

員外郎_臣牛稔文覆勘

總校官庶吉士_臣何思鈞

校對官典簿_臣郭祚熾

謄錄監生_臣劉紳

欽定四庫全書

冊府元龜

卷一百八十六

宋

王欽若等

撰

閏位部

勲業第四

陳高祖武帝少儆有大志不治生產既長讀兵書多
武藝明達果斷爲當時所推服梁大同初新喻侯蕭映
爲廣州刺史以帝爲中直兵參軍隨府之鎮映令帝招
集士馬衆至千人仍命帝監宋隆郡安化二縣不賓帝

討平之尋監西江督護高要郡守先是武林侯蕭諮為交州刺史以搭克失衆心土人李賁連結數州豪傑同時反臺遣高州刺史孫罔新州刺史盧子雄將兵擊之罔等不時進皆於廣州伏誅子雄弟子畧與罔子姪及其主帥杜天合杜僧明共舉兵執南江督護沈顗進寇廣州晝夜苦攻州中震恐帝率精兵三千捲甲兼行以救之頻戰屢捷天合中流矢死賊衆大潰僧明降梁武帝深歎異焉授直閤將軍封新安食邑三百戶仍遣盡工

圖帝容貌而觀之其年冬蕭映卒帝送喪還都至大庾
嶺會有詔以帝為交州司馬領武平太守與刺史楊髡
南討帝益招勇敢器械精利髡喜曰能克賊者必陳司
武也委以經畧帝與衆軍發自番禺是時蕭勃為定州
刺史於西江相會勃知軍士憚役陰購誘之因詭說髡
髡集諸將問計於帝對曰交趾叛渙罪繇宗室遂使僭
亂數州彌歷年稔定州復欲昧利目前不顧大計節下
奉辭伐罪故當生死以之豈可畏憚宗室輕於國憲今

若奪人沮衆何必交州討賊問罪之師卽迴有所指矣
於是勒兵鼓行而進十一年六月軍至交州貢衆數萬
於蘇歷江口立城柵以拒官軍暹推帝為前鋒所向摧
陷貢於屈獠界立砦大造船艦充塞湖中衆軍憚之頓
湖口不敢進帝謂諸將曰我師已老將士疲勞歷歲相
持恐非良計且孤軍無援入人心腹若一戰不捷豈望
生全今藉其屢奔人情未固夷獠烏合易為摧殄正當
共出百死決力取之無故停留時事去矣諸將皆默然

莫有應者是夜江水暴起七丈注湖中奔流迅激帝勒所部兵乘流先進衆軍鼓噪俱前賊衆大潰賁竄入屈獠洞中屈獠斬賁傳首京師是歲太清元年也賁兄天寶遁入九真劫帥李紹隆收餘兵二萬殺德州刺史陳文戒進圍愛州帝率衆討平之除振遠將軍西江督護高要太守督七郡諸軍事二年冬侯景寇京師帝將帥兵赴援廣州刺史元景仲陰有異志將圖帝帝知其計與成州刺史王懷明行臺選郎殷外臣等密議戒嚴三

欽定四庫全書

冊府元龜
卷一百八十六

三

年七月集兵於南海馳檄以討景仲景仲窮蹙縊于閤
下帝迎蕭勃鎮廣州是時臨賀內史歐陽頎監衡州蘭
裕蘭京禮扇誘始興十郡共舉兵攻頎頎請援於勃勃
令帝率衆救之悉擒裕等仍監始興郡十一月帝遣杜
僧明胡穎將二千人頓于嶺上并厚結始興豪傑同謀
義舉侯安都張偲等率千餘人來附蕭勃聞之遣鍾
休悅說帝曰侯景驍雄天下無敵前者援軍十萬士馬
精強然而莫敢當鋒遂令羯賊得志君以區區之衆欲

何所之如聞嶺北王侯又皆鼎沸河東桂陽相次屠戮
邵陵開建親尋干戈李遷仕託身當陽便奪馬仗以君
疎外何自暗投若且住始興遙張聲勢保此泰山自求
多福帝泣謂休悅曰僕本庸虛蒙國成造往聞侯景渡
江即欲赴援遭值元蘭梗我中道今京都覆没主上蒙
塵君辱臣死誰敢受命君侯體則皇枝任重方嶽不能
摧鋒萬里雪此冤痛見遣一軍猶賢乎已若降後旨使
人慨然僕行計決矣憑為披述乃遣間道往江陵稟承

欽定四庫全書

卷一百八十六

軍期節度時蔡路養起兵據南康勃遣腹心譚世遠為曲江令與路養相結同遏義軍大寶元年正月帝發自始興次大庾路養出軍頓南野依山立四城以拒帝帝與戰大破之路養脫身竄走帝進頓南康湘東王承制授帝員外散騎常侍持節明威將軍交州刺史改封南野縣伯六月帝修嶂頭古城徙居焉高州刺史李遷仕據大臯遣主帥平虜率千人入灝石魚梁命周文育將兵擊走遷仕奔寧都承制授帝通直散騎常侍使持節

信威將軍豫州刺史豫章內史改封長城縣侯尋授散騎常侍持節都督六郡諸軍事軍師將軍南江州刺史餘如故時寧都人劉藹等資遷仕舟艦兵仗將襲南康帝遣杜僧明等率二萬人據白口築城以禦之遷仕亦立城以相對二年三月僧明等攻拔其城生擒遷仕送南康帝斬之承制命帝進兵定江州仍授江州刺史餘如故六月帝發自南康是時承制遣東將軍王僧辯督衆軍討侯景八月僧辯軍次湓城帝率杜僧明等衆軍

及南川豪帥合三萬人將會焉時西軍乏食帝先貯軍糧五十萬石至是分三十萬以資之仍頓巴丘會侯景廢簡文帝立豫章嗣王棟帝遣兼長史沈袞奉表于江陵勸進十一月承制授帝使持節都督會稽東陽新安臨海永嘉五郡諸軍事平東將軍揚州刺史領會稽太守豫章內史餘如故三年正月帝率甲士三萬人强弩五千張舟艦三千乘發自豫章二月次桑落州遣中記室叅軍江元禮以事表江陵承制加帝鼓吹一部是時

僧辯已發湓城會帝于白茅灣乃登岸結壇刑牲約盟
進軍次蕪湖侯景城主張黑棄城走帝與諸軍進克姑
熟仍次蔡州侯景以舩舫貯石沉塞淮口緣淮作城自
石頭迄青溪十餘里中樓雉相接諸將未有所決僧辯
遣杜崩問計于帝帝曰前柳仲禮數十萬兵隔水而坐
帝繫之在青溪竟不渡岸賊乃登高望之表裏俱盡肆
其兇虐覆我王師今圍石頭須渡北岸諸將若不能當
鋒請先往立柵帝即於石頭橫隴築柵衆軍次連八城

直出東北賊恐西州路斷亦於東北果林作五城以遏
大路景率衆萬人鉄騎八百餘匹結陣而進帝曰軍志
有之善用兵者如常山之蛇首尾相應令我師既衆賊
徒甚寡應分賊兵勢以弱制強何故聚其鋒銳令必死
於我乃命諸將分處置兵賊直衝王僧志僧志小縮帝
遣徐度領弩手二千橫截其後賊乃去帝與王琳杜龕
等以鐵騎悉力乘之賊退據其柵景儀同盧輝畧開石
頭北門來降盪主戴晃曹宣等攻拔果林一城衆軍又

克其四城賊復還殊死戰又盡奪所得城柵帝大怒親率攻之士卒騰柵而入賊復散走景與百餘騎棄稍執刀左右衝陣不動景衆大潰逐北至西明門景至闕下不敢入臺遣腹心取其二子而遁帝率衆出廣陵應接景將郭元建會元建奔齊帝納其部曲三千人而僧辯啟帝鎮京口五月北齊遣將辛術圍嚴超達於秦都帝命徐度領兵助其固守齊衆七萬填塹起土山穿地道攻之甚急帝乃自率萬人解其圍縱兵四面擊齊軍弓

弩亂發齊平秦王中流矢死斬首數百級齊人收兵而退帝振旅南歸遣記室叅軍劉本仁獻捷于江陵承制授帝使持節散騎常侍都督南徐州諸軍事征北大將軍開府儀同三司南徐州刺史及王僧辯率衆征陸納於湘州承制命帝代鎮揚州梁元帝承聖二年旋鎮京口三年三月進位司空十一月西魏攻陷江陵帝與僧辯等進啟江州請晉安王以太宰承制又遣長史謝哲奉牒勸進十二月晉安王至自尋陽入居朝堂給帝班劔

二十人四年五月北齊送貞陽侯蕭淵明還主社稷僧
辯納之即位改元天成以晉安王為皇太子九月壬寅
帝召徐度侯安都周文育等討僧辯甲辰帝步軍至石
頭前進遣勇士自城北踰入擒僧辯及子頤縊殺之丙
午貞陽侯遜位百僚奉晉安王上表勸進十月己酉即
位改元紹泰元年以帝為侍中大都督中外諸軍事車
騎將軍揚南徐州刺史甲仗百人出入殿省震州刺史
杜龕僧辯之壻也據吳興與義興太守常載同舉兵反

帝命周文育率衆攻戰于義興龕遣其從弟杜北叟將兵拒戰敗歸義興辛未帝表自東討留高州刺史侯安都石州刺史杜陵宿衛臺省甲戌軍至自義興丙子拔其水柵泰州刺史徐嗣徽據其城以入齊又要南豫州刺史任約共舉兵應龕載齊人資其食嗣徽等以京師空虛率精兵五千奄至闕下侯安都領驍勇五百人出戰嗣徽等退據石頭丁丑載及北叟來降帝撫而釋之以嗣徽冠逼捲甲還都命周文育進討杜龕十一月己

卯北齊遣兵五千濟渡據姑熟帝命台州刺史徐度於
冶城等立柵南抵淮渚齊又遣安州刺史翟子崇楚州
刺史劉仕榮淮州刺史柳達摩領兵萬人於胡墅渡米
粟三萬石馬千匹入于石頭癸未帝遣侯安都領水軍
夜襲胡墅燒齊船千餘艘周鉄虎率舟師斷齊運輸擒
其北徐州刺史張領州獲運舫米數千石仍遣韋載於
野航築城使杜稜據守齊人又於金門水南立二柵以
拒官軍甲辰嗣徽等攻冶城柵帝領鐵騎精甲出自西

明門襲擊之賊衆大潰嗣徽留柳達摩等守城自率親屬腹心往南州采石以迎齊援十二月癸丑帝遣侯安都領舟師襲嗣徽家口于泰州俘獲數百人官運連艦塞淮口斷賊水路丙辰帝盡命衆軍分部甲卒對治航渡兵攻其水南二柵柳達摩等渡淮置陣帝督兵疾戰縱火燒柵烟塵漲天賊潰爭舟排擠溺死者以千數時百姓夾淮觀戰呼聲震天地軍士乘勢無不一當百盡取其船艦賊軍懾氣是日嗣徽約等領齊兵水步萬餘

人還石頭帝遣兵往江寧據要險以斷賊路賊水步不敢進
頓江寧浦口帝遣侯安都領水軍襲破之嗣徽等乘車
舸脫走丁巳拔石頭南岸柵移度北岸起柵以絕其汲
路又堙塞東門故城中諸井齊所據城中無水水一斗
貿米一升米一升貿絹一疋或炒米食之達摩謂衆曰
聞在此童謠云石頭擣兩檔擣青復擣黃侯景服青身
倒於此今吾徒衣黃豈謠言驗耶庚申達摩遣使侯子
欽劉仁榮等潛來請和帝許之乃於城門外刑牲盟約

其將士部曲一無所問從其南北辛酉帝出石頭南門
陳兵數萬送齊人歸北者壬戌和州長史烏九遠自南
州奔還歷陽江寧令陳嗣黃門侍郎曹朗據姑熟反帝
命侯安都徐度等討平之斬首數千級聚為京觀石頭
採石南州悉收其馬仗船米不可勝計是月杜龕以城
降二年正月癸未誅杜龕于吳興龕從弟北叟司馬沈
孝敦並賜死二月庚申帝遣侯安都周鐵虎率舸艦備
江州仍頓梁山起柵甲子勅司空有軍旅之事可騎馬

出入城內三月戊戌北齊遣水軍儀同蕭軌等率衆十萬出柵口向梁山帝遣侯安都及定州刺史沈泰吳郡太守裴忌共據梁山以禦之五月己亥帝率宗室王侯及朝臣將帥於大司馬門外白虎闕下刑牲告天以齊人背約發言慷慨涕泗交流同盟皆莫能仰視士卒觀者益奮丙申齊兵至秣陵故治六月丙子至玄武湖己卯帝率帳內麾下衆軍首尾齊舉臨水大戰破之帝表解南徐州以授安都七月丙子詔授帝中書監司徒揚

州刺史進爵為公增邑并前五千戶食安吉武康二縣
侍中使持節都督諸軍事乘給碧幢阜輪車是月侯瑱
以江州入附遣侯安都鎮上流定南中諸郡九月壬寅
改年曰太平元年進帝位丞相錄尚書事鎮衛大將軍
改刺史為牧進封義興郡公二年二月庚午蕭勃舉兵
自廣州度嶺頓南康遣將歐陽頔傳泰及其子孜為前
軍至于豫章分屯要險南江州刺史余孝頃起兵應勃
帝命周文育侯安都率眾討平之八月甲午進位太傅

加黃鉞

臣欽若等曰自此以後褒寵並具閏位錫命門

是月湘州刺史王琳擁

兵不應命帝遣周文育侯安都率衆討之九月辛丑詔

曰肇昔元台剖判太素氤氲崇建人皇必憑洪宰故賢

哲之后牧伯征于四方神武之君太監治乎萬國又有

一匡九合渠門之錫以隆戮帶圍溫行宮之寵斯茂時

危所以貞固運泰所以光熙斯乃千載同風百王不刊

之道也太傅義興公允文允武廼聖廼神固天生德康

濟黔首昔在休期早隆朝寄遠踰滄海大拯交越皇運

不造書契未聞中國其亡兵凶總至哀哀噍類譬彼窮
牢悠悠上天莫云斯極否終泰始元輔應期將此方推
援茲已溺乘舟履輦架險浮深經畧中途畢殲羣醜洎
乎石頭姑熟流髓履腸一朝指撓六合清宴是用先朝
下武翼亮中都雪三后之勁讐夷三靈之巨慝堯台禹
佐未始能階殷相周師固非云擬重之以屯剝餘象荆
楚大摧天地無心乘輿委御劉石薦食競謀諸夏八方
暴時莫有裨救彊臣放命黜我冲人顧影於荼孺之魂

甘心於寧卿之辱却按下髻求哀之路莫從竊鉢逃責
容身之地無所公神兵奄至不日清澄惟是孱蒙再膺
天祿斯又巍巍蕩蕩無得所稱焉加以仗茲忠義屠彼
祇逆震部夷氛稽山罷褫番禺蠡澤北鄙西郊殲厥凶
徒罄無遺種斯則兆民之命修短所懸率土之基興亡
是賴於是刑禮兼訓沿革有章中外咸平遐邇寧一用
能使陽光合魄曜象呈暉棲閣游庭挹仁含信宏勲該
於厚地大道格於玄天義農炎昊以來卷領垂衣之世

聖人濟物未有如斯者也夫備物典策桓文是膺助理
陰陽蕭曹不讓未有功高於寓縣而賞薄於伊周凡厥
人祇固懷延佇實繇公撝謙自牧降損為懷嘉數遲回
永言增歎豈可申茲雅尚久廢朝猷宜戒司勲敬昇鴻
典且重華大聖媯汭惟賢盛德之祀無忘公侯之門必
復是以殷嘉亶父繼后稷之官堯命羲和纂重黎之位
况其本枝攸建宜誓山河者乎其進公位相國總百揆
封十郡為陳公備九錫之禮加璽垂紱遠遊冠綬綬位

在諸侯王上其鎮衛大將軍揚州牧如故策曰大哉乾
元資日月以貞觀至哉坤元憑山川以載物故惟天為
大陟配者欽明惟王建國翼輔者齊聖是以文武之佐
礪礪蘊其玉璜堯舜之臣滎河鏤其金版況乎體得一
之鴻姿寧陽九之危厄拯橫流于碣石撲燎火於崑崙
驅馭於韋彭跨躔於齊晉神功行而靡用聖道運而無
名者乎今將授公典策其敬聽朕命日者昊天不弔鍾
亂於我國家網漏吞舟彊敵內鼎茫茫宇宙惴惴黎元

方足圓顱萬不遺一太清否亢橋山之痛已深大寶屯
如平陽之禍相繼上宰膺運康救兆民鞠旅於潢池之
南揚旌於桂嶺之北懸三光於既墜謚四海於羣飛屠
契窳於中原斲鯨鯢於濛汜蕩寧上國光啟中興此則
公之大造於皇家者也既而天未悔禍羣醜薦臻南夏
沸騰西京蕩覆羣方孔熾藉亂乘間推納藩枝盜假神
器冢司昏撓旁引寇讎既見貶於桐宮方謀危於漢閣
皇運已殆何殊贅旒中國搖然非徒如綫公赫然投袂

匡救本朝復莒齊都平戎王室朕所以還膺寶歷重履
宸居挹建武之風猷歌宣王之雅頌此又公之再造於
皇家者也公應務之初登庸惟始二州五嶺莫不窺臨
銀洞珠宮所在寧謐孫盧肇蒙越貊為羣番郡貼危勢
將淪殄公赤旗所指祆壘洞開白羽纔撫兇徒粉潰非
其神武乂喪南藩此又公之功也大同之末邊政不修
李賁狂迷竊我交愛敢稱大號驕蹇甚於尉陀據有連
州雄豪熾於梁碩公英謨雄筭電掃風行馳禦樓船直

跨滄海新昌典激備履艱難經歷嘉寧盡為京觀三山
獠洞八角蠻陬逝矣水寓之鄉悠哉火山之國馬援之
所不屈陶璜之所未開莫不懼我王靈爭朝邊候歸琛
天府獻狀鴻臚此又公之功也自寇虜陵江宮闈幽辱
公枕戈嘗膽提劔拊心氣湧清霄神飛紫閣而番禺連
率本自諸夷言得其朋是懷同惡公仗此忠誠乘機勦
定執沛令而蒙鼓平新野而據鞍此又公之功也世道
初艱方隅多難勲門桀黠作亂衡疑兵切池隍衆兼夷

獠公以國盜邊警知無不為恤是同盟誅其醜類莫不
魚驚鳥散面縛頭懸南土黔黎重保蘇息此又公之功
也長驅嶺嶠夢想京畿緣道酋豪逋為榛梗路養渠率
全據大都畜聚逋逃方謀阻亂百樓不戰雲梯之所未
窺萬弩齊張高輶之所非敵公龍驤虎步嘯叱風雲山
靡堅城野無彊陣清祆氛於灝石滅沴氣於雩都此又
公之功也遷仕凶慝屯據大臯

臣欽若等曰遷仕姓李
為高州刺史據大臯叛

攻南
康

乞活類馬騰之軍流民多杜弢之衆摧鋒轉鬪自

北徂南頻歲稽誅實惟勅虜公坐揮三畧遙制六奇義
勇同心貌貅騁力風驅電擊谷靜山空列郡無犬吠之
驚叢祠罷狐鳴之盜此又公之功也王師討虜次屈淪
波兵乏兼儲士有饑色公迴麾螽澤積谷巴丘億廩之
詠斯豐壺漿之迎是衆軍民轉漕曾無砥柱之難艫舳
相望如運敖倉之粟犀渠貝冑顧蔑雷霆高檻層樓仰
捫霄漢故三軍勇銳百戰無前承此兵糧遂誅兇逆此
又公之功也若夫英圖邁俗義旅如雲湓壘猜搆用淹

戎畧公志唯同獎師克在和鵠塞北虞鴻門是會若晉
侯之誓白水如蕭王之推赤心屈禮交盟人祇感咽故
能使舟師竝路遠邇同心此又公之功也姑熟襟要嶠
函憑凌寇虜據其關梁大盜負其扁鑄公一校裁撓三
雄竝奮左賢右角音祿沙潰土分木甲殪於中原氍毹赴
於江水佗佗藉藉萬計千羣鄂坂之隘斯開夷庚之進
無塞此又公之功也義軍大衆俱奮帝京逆豎兇徒猶
屯皇邑若夫表裏山河金湯嶮固疏龍首以抗殿剪華

嶽以為城雜虜憑焉強兵自若公迴茲地軸抗此天羅
曾不崇朝俾無遺噍軍容甚穆國政方修物重覩於衣
冠民還瞻於禮樂楚人蒲道爭覩於葉公漢老啣悲俱
歡於司隸此又公之功也內難初靜諸侯出關外郡傳
烽鮮卑犯塞莫非且渠當戶中貴名王冀馬列於淮南
胡笳動於徐北公舟師步甲亘野橫江殲厥羣羝遂殫
封豕莫不絳木而止戎車靡遺遇寧而旋歸驂盡殪此
又公之功也公克平禍難勛勞皇室而孫寧之黨翻啟

狡心伊維之間咸為異境雖金陵佳氣石壘天嚴朝閣
邊塵夜喧征鼓公三籌既畫八陣斯張載舉靈鉦未抽
金僕咸俘醜類悉反高塘異李廣之皆誅同龐元之盡
赦此又公之功也任約叛渙梟聲不悛戎羯貪婪狄心
無改公左甄右落箕張翼舒掃是攬搶驅其獫狁長狄
之種埋於國門椎髻之酋烹於軍市投秦坑而盡沸噓
渚水而不流此又公之功也一相居中自安藝鼎五湖
小守妾懷同惡公夙駕兼道夜甲仗戈玉斧將揮金鉦

且戒祆酋震懼遽請灰釘蕪櫬以表其含弘焚書以安

其反側此又公之功也賊龕兇橫凌虐具區

臣欽若等曰賊龕即

震州刺史杜龕舉兵據吳興叛也

阻兵安忍憑災怙亂自古蟲言鳥迹

渾沌洪荒人或虔劉未此殘酷公雖宗居汝潁世寓東

南育聖誕賢之鄉含章挺生之地眷言桑梓公私憤切

卓爾英猷承規奉算戮此大憝如烹小鮮此又公之功

也亂離永久羣盜孔多浙左羣渠連兵構逆豈止千兵

五校白雀黃龍而已哉公以中軍無帥選是親賢姦寇

途窮漼然冰泮刑塘之所文命動其大威雷門之間勾踐行其嚴戮英規聖迹異代同風此又公之功也同姓有扈頑兇不賓憑藉宗盟圖危社稷觀兵匯澤勢震京師驅率南蠻已為東帝公論兵於廟堂之上決勝於樽俎之間冠賔樊滕浮江下瀨一朝翦撲無待旬師萬里澄清非勞新息此又公之功也豫章祇冠依憑山澤繕甲完聚多歷歲時結縱連橫爰洎交廣呂嘉既獲吳淠已擬命我還師征其不恪連營盡拔偽黨斯擒曜聖武

於廬山迴神姓於蠡辰此又公之功也自八紘九野瓜
剖豆分竊帝倫王連州比縣公武靈已暢大德又宣折
簡馳書風猷斯遠至於蒼蒼浴日杳杳無雷北洎幽都
南踰丹徼莫不屈膝膜拜求吏款關此又公之功也京
師禍亂孔亟積暄雙闕低昂九門寥豁寧秦宮之可顧
豈魯殿之猶存五郡簪弁百僚卿士胡服縵纓咸為戎
俗高冠厚履非復華風宋微子麥穰之刺周大夫黍離
之歎方之於斯未足為悲矣公求衣昧旦反席高春興

構宮闈具瞻遐邇郊庠宗稷之典六符十算之章還聞
太始之高風重覩永平之遺事此又公之功也公有濟
世之勲重之以凝神體道合德符天用百姓以為心隨
萬機以自務恥一物非唐虞之民歸含靈於仁壽之域
上德不德無為以為夏長春生顯仁藏用忠信為寶風
雨弗愆仁惠為基馬牛勿踐功成治定樂奏咸雲安上
治民禮兼文質物色丘園衣裾里巷朝多君子野無遺
賢菽粟同水火之饒工商富倚頓之旅是以天無蘊寶

地有呈祥瀟露卿雲朝團曉暎山車澤馬服馭登閑既
炳煥於圖書方歲凝於史牒高勲踰於象緯積德冠於
嵩華固無得而稱者矣朕又聞之前王宰世茂賞尊賢
式樹藩長總征羣伯二南崇絕四履遐曠泱泱表海胙
土維齊巖巖泰山俾侯于魯抑又勤王反鄭夾輔遷周
召伯之命斯隆河陽之禮咸備况復經營宇宙豈唯斷
鰲足之功宏濟蒼生非直鑿龍門之險而疇庸報德寂
爾無聞朕所以垂拱當宇載懷慙悸者也今授公相國

以南豫州之陳留南丹陽宣城揚州之吳興東陽新安
寧國南徐州之義興江都之鄱陽臨川十郡封公為陳
公錫之青土苴以白茅爰定爾邦用建冢社昔旦奭分
陝俱為保師晉鄭諸侯咸作卿士兼其內外禮實攸宜
今命持節兼太尉王通授相國印綬陳公璽紱使持節
兼司空王瑒授陳公茅土金虎符第一至第五左竹使
符第一至第十相國秩踰三鉉任總百司位絕朝班禮
繇事革其以相國總百揆除錄尚書之號上所假節侍

中貂蟬中書監印章中外都督太傅印綬義興公印策
其鎮衛大將軍揚州牧如故又加公九錫其敬聽後命
以公禮為楨幹律等銜策四維皆舉八柄有章是用錫
公大輅戎車各一玄牡二駟以公賤寶崇穀疏爵待農
室富京坻民知榮辱是用錫公衮冕之服亦舄副焉以
公調理陰陽變諧風雅三靈允降萬國同和是用錫公
軒懸之樂六佾之舞以公宣導英猷弘開風教光景所
炤韞象必通是用錫公朱戶以居以公抑揚清濁褒德

進賢髦士盈朝幽人虛谷是用錫公納陞以登以公凝
然廊廟為世鎔範持衡四表臨御八荒是用錫公虎賁
之士三百人以公執茲明罰期在刑措象恭無赦千紀
必誅是用錫公斧鉞各一以公英猷遠量跨厲嵩溟已
一車書括囊寰宇是用錫公彤弓一彤矢百盧弓十盧
矢千以公天經地義貫徹幽明春露秋霜尤恭棗盛是
用錫公鉅鬯一卣圭瓚副焉陳國置丞相已下一遵舊
式往欽哉其恭循朕命克相皇天宏建邦家佐興洪業

以光我高祖之休命十月戊辰進陳公爵為王以揚州之會稽臨清永嘉建安南徐州之晉陵信義江州之尋陽豫州安成廬陵并前二十郡益封陳國其相國揚州牧鎮衛大將軍竝如故又命陳王冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鐘簾宮懸王妃王子王女爵命之號陳臺百官一依舊典是月辛未遂受梁禪

世祖文帝始興昭烈王之子少沈敏有識量留意經史

舉動方雅造次必遵禮法高祖甚愛之侯景之亂鄉人多依山湖寇抄帝獨保家無所犯時亂日甚乃避地臨安及高祖舉義兵侯景使收帝及衡陽王獻王帝乃密裹小刀冀因入見而害景至便屬吏故其事不行高祖大軍圍石頭景欲加害者數矣會景敗乃得出起家吳興太守時宣城劫帥紀機郝仲等各聚衆千餘人侵掠郡境帝討平之梁承聖二年授信武將軍監南徐州三年高祖北往廣陵使帝為前軍每戰克捷高祖之討王

僧辯也先召帝與謀時僧辯女婿杜龕據吳興兵衆甚盛高祖令帝還長成立柵以備龕帝收兵纔數百人戰備又少龕遣其將杜泰領精兵五千乘虛奄至將士相視失色而帝言笑自若部分益明於是衆心乃定泰知柵內人少日夜苦攻帝激勵將士身當矢石相持數旬泰乃退走高祖遣周文育率兵討龕龕兵尚衆斷據要衝水步連陣相結帝命將軍劉澄蔣元舉率衆攻龕龕軍大敗窘急因請降東揚州刺史張彪起兵圍臨海太

守懷振振遣使求救帝與周文育輕兵往會稽以掩彪
彪將沈泰開門納帝帝盡收其部曲家累彪至又破走
若耶村民斬彪傳其首以功授持節都督會稽等十郡
諸軍事宣毅將軍會稽太守山越深險皆不賓附帝分
命討擊悉平之威惠大振高祖即位封為臨川郡王邑
二千戶拜侍中安東將軍及周文育侯安都敗於沌口
詔帝入衛軍儲戎備皆以委焉尋命率兵城南皖永定
三年六月即帝位

北齊高祖神武皇帝渤海蓀人高樹之子素家貧自隊
主轉為函使與懷朔省事雲中司馬子如及秀容人
劉貴中山人賈顯智為奔走之友懷朔戶曹史孫騰外
兵使侯景亦相友結柔玄鎮人杜雒周反於上谷帝與
同志從之醜其行事私與尉景段榮蔡雋圖之不果而
逃奔葛榮又亡歸爾朱榮以帝為親信都督時後魏孝
明銜鄭儼徐紇逼靈太后未敢制私使榮舉兵內向榮
以帝為前鋒至上黨會孝莊立以定策勲封為銅鞮伯及

爾朱榮擊葛榮令帝諭下賊別稱王者七人後與行臺
于暉破羊侃于泰山又與元天穆破邢杲于濟南累遷
第三鎮人酋長晉州刺史於是大聚斂因劉貴貨榮下
要人盡得其意及孝莊誅榮其從子兆自晉陽舉兵入
雒執孝莊立長廣王暉改元建明封帝為平陽郡公及
費也頭紇豆陵步藩入秀容逼晉陽兆徵帝帝將往賀
拔馬過兒請緩行以備之帝乃往逗遛辭以河無橋不
得渡步藩軍盛兆敗走初孝莊之誅爾朱榮知其黨必

有逆謀乃密勅步藩令襲其後步藩既敗兆等以兵勢日盛兆又請救於帝帝內圖兆復慮步藩後之難除乃與兆悉力破之藩死兆深德於帝誓為兄弟時爾朱榮從弟度律從父弟世隆及彥伯共執朝政從祖兄子仲遠據東郡天光據關右兆據并州各擁兵為暴天下苦之葛榮衆流入并肆者二十餘萬為契丹陵暴皆不聊生大小二十六反誅夷者半猶草竊不止兆患之問計於帝帝曰六鎮反賊不可盡殺宜選王素腹心者私使統焉若有

反者直罪其帥則所罪者寡兆曰善誰可行也賀拔允

時在坐帝拳毆之折其一齒曰生平天柱時

臣欽若等曰爾朱榮

為天柱大將軍

奴輩伏處分如鷹犬今日天下安置在王而阿

鞠泥敢誣下罔上請殺之兆以帝為誠遂以委焉帝以

兆醉恐醒後或致疑貳遂出宣言受委統州鎮兵可集

汾東受令乃建牙陽曲川陳部分有款軍門者絳巾袍

自稱梗陽驛子願厠左右訪之則以力聞嘗於并州市

格殺人者乃署為親信兵士素惡兆而樂神武於是莫

不皆至居無何又使劉貴請兆以并肆頻歲霜早降戶掘黃鼠而食之皆面無穀色徒污人國土請令就食山東待溫飽而處分之兆從其議其長史慕容紹宗諫曰不可令四方擾擾人懷異望況高公雄畧又握大兵將不可為兆曰香火誓重何所慮也紹宗曰親兄弟尚難可信何論香火時兆左右已受帝金即譖紹宗與帝舊有隙兆乃禁紹宗而催帝帝乃自晉陽出滏口路逢爾朱榮妻北鄉長公主自雒陽來馬三百匹盡奪易之兆

聞乃釋紹宗而問焉紹宗曰猶掌握中物也於是自追
帝至襄垣會漳水暴長橋壞帝隔水拜曰所以借公主
馬非有他故備山東盜耳王受讒言自來賜追今渡河
而死不辭此衆便叛兆乃陳無此意因輕馬渡與帝坐
幕下陳謝遂授刀引頭使帝斫已帝大哭曰自天柱薨
背賀六渾臣欽若等曰賀六渾神武字也更何所仰願大家千萬歲以
申力用今傍人構間至此大家何忍復出此言兆投刀
於地遂刑白馬而盟誓為兄弟留宿夜飲尉景伏壯士

欲執兆帝齧臂止之曰今殺之其黨必奔歸聚結兵饑
馬瘦不可相支若英雄崛起則為害滋甚不如且置之
兆雖勁捷而兇狡無謀不足圖也旦日兆歸營又召帝
將上馬詣之孫騰牽衣乃止隔水肆罵馳還晉陽兆心
腹念賢領帝戶家累別為營帝偽與之善觀其佩刀因
取之以殺其從者盡散於是士衆咸悅倍願附從既出
淦口倍加約束纖毫之物不聽侵犯將過麥地帝輒步
牽馬遠近聞之皆稱高儀同將兵整肅益歸心焉遂前

行屯鄴求糧於相州刺史劉誕誕不供有軍營租米帝
自取之魏普泰元年二月神武自軍次信都高乾封隆
之開門以待遂據冀州是月爾朱度律廢長廣王而立
節閔封帝為渤海王四月又加東道大行臺第一鎮人
酋長龐蒼鷹自太原來奔帝以為行臺郎尋以為安州
刺史神武自向山東養士繕甲禁侵掠百姓歸心乃詐
為書言爾朱兆將以六鎮人配契胡為部曲衆皆愁又為
并州符徵兵討步落稽發萬人將遣之孫騰尉景為請

留如此者再帝親送之郊雪涕執別人皆號慟哭聲動地帝乃諭之曰與爾俱殊鄉客義同一家不意在上乃爾徵召直向西已當死後軍期又當死配國人又當死奈何衆曰唯有反耳帝曰反是急計須推一人為主衆曰願奉帝曰爾鄉里難制不見葛榮乎雖百萬衆無刑法終自灰滅今以吾為主當與前異不得欺漢兒不得犯軍令生死任吾則可不爾不能為取笑天下衆皆頓顙死生唯命帝曰若不得已明日椎牛饗士諭以討爾

朱之意封隆之進曰千載一時普天幸甚帝曰討賊大順也拯時大業也吾雖不武以死繼之何敢讓為六月庚子建義於信都尚未顯背爾朱氏及李元忠與高乾平殷州斬爾朱羽生首來謁帝撫膺曰今者反決矣乃以元忠為殷州刺史是時兵威既振乃抗表罪狀爾朱氏世隆等秘表不通八月爾朱兆攻陷殷州李元忠來奔孫騰以為朝廷隔絕不權立天子則衆望無所係十月壬寅奉章武王融子渤海太守王朗為皇帝年號中興

是為廢帝時爾朱度律仲遠軍次維陽爾朱兆會之帝
用竇泰策縱反間度律仲遠不戰而還帝乃敗兆於廣
阿十一月攻鄴相州刺史劉誕嬰城固守帝起土山為
地道往往建大柱一時焚之城陷入地麻祥時為湯陰
令帝呼之曰麻都祥慚而逃永熙元年正月壬午拔鄴
城據之廢帝進帝大丞相柱國大將軍太師是時青州
建義大都督崔靈珍大都督耿翔皆遣使歸附行汾州
事劉貴棄城來降閏三月爾朱天光自長安北自并州

度律自雒陽仲遠自東郡同會鄴衆號二十萬夾洹水而軍節閔以長孫承業為大行臺總督焉帝令封隆之守鄴自出頓紫陌時馬不滿二千步兵不至三萬衆寡不敵乃於韓陵為圓陣連牛驢以塞歸道於是將士皆為死志四面赴擊之爾朱兆責帝以背已帝曰本戮力者共輔王室今帝何在兆曰永安枉害天柱我報讐耳帝曰我昔日親聞天柱計汝在戶前立豈得言不反耶且以君殺臣何報之有今日義絕矣乃合戰大敗之爾

朱兆對慕容紹宗叩心曰不用公言以至於此將輕走
紹宗反旗鳴角收聚散卒成軍容而西上高季式以七
騎追奔度野馬崗與兆遇高昂望之不見哭曰喪吾弟
矣夜久季式還梁血滿袖斛斯椿倍道先據河橋四月
斛斯椿執天光度律以送雒陽長孫承業遣都督賈顯
智張歡入雒陽執世隆彥伯斬之兆奔并州仲遠奔梁
州遂死焉時凶蠹既除朝廷慶悅帝至雒陽廢節閤及
中興王而立孝武孝武即位以帝為天柱大將軍太師

世襲定州刺史增封并前十五萬戶帝自滏口入爾朱兆大掠晉陽北保秀容并州平帝以晉陽四塞乃建大丞相府而定居焉兆既至秀容分兵守險出入寇抄帝揚聲討之師出止者數四兆意怠帝揣其歲首當宴會遣竇泰以精騎馳之一日一夜行三百里帝以大軍繼之二年正月竇泰奄至爾朱兆庭軍人因宴休惰忽見泰驚走追破之於赤洪嶺兆自縊帝親臨厚葬之初帝之入雒也爾朱仲遠部下都督喬寧張子期自滑臺歸命

帝以其助亂且數反覆皆斬之斛斯椿繇是內不自安乃與南陵王竇炬及武衛將軍元毗魏光祿王思政構帝於孝武舍人元士弼又奏帝受勅大不敬故孝武心貳於賀拔岳時司空高乾密啟帝言孝武之貳帝封呈孝武殺之天平元年二月封隆之與孫騰私言隆之喪妻孝武欲妻以妹騰亦未之信隆之泄其言於斛斯椿以白孝武又孫騰帶仗入省擅殺御史竝亡來奔稱孝武搃舍人梁續於前光祿少卿元子幹攘臂擊之謂騰曰語爾

高王元家兒拳正如此領軍婁昭辭疾歸晉陽魏帝於是
以斛斯椿兼領軍分置督將及河南關西諸刺史華
山王紇在徐州帝使邸珍奪其管籥建州刺史韓賢濟
州刺史蔡儁皆帝同義魏帝忌之故省建州以去賢使
御史中尉綦儁察儁罪以開府賈顯智為濟州儁拒之魏帝
愈怒五月下詔云將征句吳發河南諸州兵增宿衛守
河橋六月丁巳密詔帝曰宇文黑獺自平破秦隴多求
非分脫有變詐事資經畧但表啟未全背戾進討事涉

忽忽遂召羣臣議其可否僉言假稱南伐內外戒嚴一則防豫不虞二則以威吳楚時魏帝將伐帝部恐帝部將帥慮疑故有此詔帝乃表曰荊州綰接蠻右密邇畿服關隴恃遠將有逆圖臣今潛勒兵馬三萬擬從河東而渡又遣鎮州刺史庫狄千瀛州刺史郭瓊汾州刺史斛律金前武衛將軍彭樂擬兵四萬從其來遼津渡遣領軍將軍婁昭相州刺史竇泰前燕州刺史堯雄并州刺史高隆之擬兵五萬以討荊州遣冀州刺史尉景前

冀州刺史高敖曹濟州刺史蔡雋前侍中封隆之擬山
東兵七萬突騎五萬以征江左皆約勒所部伏聽處分
魏帝知覺其變乃出帝表命羣伯議之欲止帝諸軍帝
乃集在并州僚佐令其博議還以表聞仍以信誓自明
忠款曰臣為嬖佞所間陛下一旦賜疑令猖狂之罪爾朱
時計臣若不盡誠竭節敢負陛下則使身受天殃子孫
殄絕陛下若垂信赤心使干戈不動佞臣一二人顧斟
量廢黜辛未魏帝復錄在京文武議意以答帝使舍人

溫子昇草勅子昇逡巡未敢作魏帝據胡床拔劔作色
子昇乃為勅曰前持心血遠以示王深冀彼此共相體
悉而不良之徒坐生間貳近孫騰倉卒向彼致使聞者
疑有異謀故遣御史中尉綦儁具申朕懷今得王啟言
誓懇惻反覆思之猶所未解以朕眇身遇王武畧不勞
尺必坐為天子所謂生我者父母貴我者高王今若無
事背王親相攻討則使身及子孫還如王誓皇天后土
實聞此言近慮宇文為亂賀拔勝應之故纂嚴欲與王

俱為聲援宇文今日使者相望觀其所為更無異迹賀
拔在南開擴邊境為國立功念無可責君若欲分討何
以為詞東南不賓為日已久先朝已來置之度外今天
下戶口減半未宜窮兵極武朕既闇昧不知佞人是誰
可列其姓名令朕知也如聞庫狄千語王云本欲取懦
弱者為主王無事立此長君使其不可駕御今但作十
五日自可廢之更立餘者如此議論自是王間勲人豈
出佞臣之口去歲封隆之背叛今年孫騰逃走不送誰

不恠王騰既為禍胎曾無愧懼若事君盡誠何不斬送
二首王雖啓圖西去而四道俱進或欲南度雒陽或欲
東臨江左言之者猶怪聞之者寧能不疑王若守誠不
貳晏然居北在此雖有百萬之衆終無圖彼之心王脫
信邪忘義舉旗南指縱無匹馬隻輪猶欲奮空拳而爭
死朕本寡德王立之百姓無知或謂實可若為他所圖
則彰朕之惡假令還為王殺幽辱壅粉了無遺恨向者
王既以德見推以義見舉一朝背德舍義便是過有所

歸本望君臣一體若合符契不圖今日分疎到此古語云越人射我笑而道之吾兄射我泣而道之朕既親王情如兄弟所以投筆拊膺不覺歔歔初帝自京師將北以為雒陽久經喪亂王室衰盡雖有山河之固土地褊狹不如鄴請遷都魏帝曰高祖定鼎河雒為永永之基經營制度至世宗乃畢王既功在社稷宜遵太和舊事帝奉詔至是復謀焉遣三千騎鎮建興益河東及濟州兵於白溝虜船不敢向雒諸州和糴粟運入鄴城魏帝

又勅帝曰王若厭伏人情杜絕物議唯有歸河東之兵
罷建興之戍送相州之粟追濟州之軍令蔡雋受代使
卽珍出徐止戈散馬各事家業脫須糧廩別遣轉輸則
讒人結舌疑悔不生王高枕太原朕垂拱京雒終不舉
足渡河以干戈相指王若馬首南向問鼎輕重朕雖無
武欲止不能必為社稷宗廟出萬死之策決在於王非
朕能定為山止簣相為惜之魏帝時以任祥為兼尚書
左僕射加開府祥棄官走至河北據郡待帝魏帝乃勅

文武官北來者任去留下詔罪狀帝為北伐經營帝亦
勒馬宣告曰孤遇爾朱擅權舉大義于四海奉戴主上義
貫幽明橫為斛斯椿讒構以誠節為逆首昔趙鞅興晉
陽之甲誅君側惡人今者南邁誅椿而已以高昂為前
鋒曰若用司空言豈有今日之舉司馬子如答帝曰本
欲立小者正為此耳魏帝徵兵關右召賀拔勝赴行在
所遣大行臺長孫承業大都督潁川王斌之斛斯椿共
鎮虎牢汝陽王暹鎮石濟行臺長孫子彥帥前弘農太

守元洪畧鎮陝賈顯智率豫州刺史斛斯元壽伐蔡儁帝使竇泰與左相大都督莫多婁貸文逆顯智韓賢逆暹元素軍降泰貸文與顯智遇於長壽津顯智陰約降引軍退軍司元玄覺之馳還請益師魏帝遣大都督侯幾紹赴之戰於滑臺東顯智以軍降紹死之七月魏帝躬率大衆屯河橋帝至河北十餘里再遣口申誠款魏帝不報乃引軍渡河魏帝問計於羣臣或云南依賀拔勝或云西就關中或云守雒口死戰未決而元斌之與斛

斯椿爭權不睦斌之棄椿逕還給魏帝云帝兵至即日
魏帝遜於長安己酉帝入雒陽停永寧寺八月甲寅召
集百官謂曰為臣奉主拯救危亂若處不諫諍出不陪
隨緩則耽寵爭榮急便逃竄臣節安在遂收開府儀同
三司叱列延慶兼尚書左僕射辛雄兼吏部尚書崔孝
芬都官尚書劉廙兼度支尚書楊機散騎常侍侍中元
士弼並殺之誅其貳也士弼籍沒家口帝以萬幾不可
曠廢乃與百僚議以清河王亶為大司馬居尚書下舍

而承制決事焉王稱警蹕帝尋至弘農遂西克潼關執
毛洪賓進軍長城龍門都督薛崇禮降帝退舍河東命
行臺尚書長史薛瑜守潼關大都督庫狄溫守封陵於
蒲津西岸築城守華州以薛紹宗為刺史高昂行豫州
事帝自發晉陽至此凡四十啓魏帝皆不答九月庚寅
帝還至雒陽乃遣僧道榮奉表關中又不答乃集百僚
沙門耆老議所推立以為自孝昌衰亂國統中絕神主
靡依昭穆失序永安以孝文為伯考永熙遷孝明於夾

室業喪祚短職此之繇議立清河王世子善見是為孝
靜帝魏於是始分為二帝以孝武既西恐逼峻陝雒陽
復在河外接近梁境如向晉陽形勢不能相接依議遷
鄴護軍祖瑩贊焉詔下三日車駕便發戶四十萬狼狽
就道帝留雒陽部分事畢還晉陽自是軍國政務皆歸
相府二年正月西魏渭州刺史爾朱渾道元擁衆內屬
帝迎納之壬戌帝襲擊山胡劉蠡升大破之是月孝靜
褒詔以帝為相國假黃鉞劔履上殿入朝不趨帝固辭

三月帝欲以女妻蠡升太子候其不設備辛酉潛師襲之其北部王斬蠡升首以送其衆復立其子南海王帝進擊之又獲南海王及其弟西海王北海王皇后公卿以下四百餘人胡魏五萬戶三年正月甲子帝帥庫狄千等萬騎圍西魏夏州身不火食四日而至縛稍為梯夜入其城於是生擒費也頭斛拔俄彌突因而用之留都督張瓊以鎮守遷其部落五千戶以歸西魏靈州刺史曹泥與其婿涼州刺史劉豐遣使請內屬周太祖圍

泥水灌其城不沒者四尺帝命阿至羅發騎三萬徑度
靈州繞出西軍後獲馬五十匹西師乃退帝率騎迎泥豐
生拔其遺戶五千以歸復泥官爵孝靜詔加帝九錫固
讓乃止二月帝令阿至羅逼西魏秦州刺史建忠王万
俟普撥帝以衆應之三月普撥與其子太宰壽會于幽
蒲津以水薄不得赴救乃班師是月高昂克上雒十一
月壬辰帝西討自蒲津濟衆二十萬周太祖軍於沙苑
帝以地阨少却西人鼓噪而進軍大亂棄器甲十有八

萬帝跨橐駝候船以歸元象元年三月辛酉帝固請解丞相孝靜許之七月壬午行臺侯景司徒高昂圍西魏將獨孤信於金墉西魏帝及周太祖並來赴救大都督庫狄千帥諸將前驅帝總衆繼進八月辛卯戰於河陰大破西魏軍俘獲數萬司徒高昂大都督李猛宗顯死之西帥之敗獨孤信先入關周太祖留其都督長孫子彥守金墉遂燒營以遁帝遣兵追奔至崤不及而還初帝知西師來侵自晉陽率衆馳赴至孟津未濟而軍有

勝負既而帝渡河子彥亦棄城走帝遂毀金墉而還十一月庚午朝京師十二月壬辰還晉陽興和元年七月丁丑孝靜進帝為相國錄尚書事固讓乃止十二月乙丑帝以新宮成朝於鄴辭渤海王及都督中外諸軍事詔不許四年五月辛巳朝鄴六月甲辰還晉陽九月帝西征十月己亥圍西魏儀同三司王思政於玉壁城欲以挑敵西師不敢出武定元年二月壬申北豫州刺史高慎據虎牢西叛三月壬辰周太祖率衆援高慎圍河

橋南城戊申帝大敗之於芒山擒西魏督將已下四百餘人俘斬六萬計是時軍士有盜殺驢者軍令應死帝弗殺將至并州決之明日復戰奔西軍告帝所在西師盡銳來攻衆潰帝失馬赫連陽順下馬以授帝與蒼頭馮文雒扶上俱走西魏大帥賀拔勝以十三騎逐帝河州刺史劉洪徽射中其二勝稍將中帝段先橫射勝馬殪遂免豫雒二州平帝使劉豐追奔至弘農還八月孝靜詔帝為相國錄尚書事固辭乃止十二月己卯朝京

師庚辰還晉陽二年三月癸巳帝巡行冀定二州因朝
京師四月丙辰還晉陽十一月帝討山胡破平之俘獲
一萬餘戶口分配諸州三年正月甲午開府儀同三司
爾朱文暢開府司馬任胄都督鄭仲禮中府主簿李世
林前開府參軍房子遠等謀弑帝因十五夜打簇懷刃
而入其黨薛季孝以告並伏誅三月乙未帝朝鄴丙午
還晉陽四年八月帝將西伐自鄴會兵於晉陽九月圍
玉壁以挑西師不敢應西魏晉州刺史韋孝寬守玉壁

城中出鐵面帝使元盜射之每中其目用李業興孤虛術萃其北北天險也乃起土山鑿十道又於東面鑿二十道以攻之城中無水汲於汾帝使移汾一夜而畢孝寬奪據土山頓軍五旬城不拔死者七萬人聚為一冢是月帝有疾十一月庚子與疾班師以無功表解都督中外諸軍事五年正月丙午終於晉陽天保初文宣即位追崇為獻武帝廟號大宗

世祖文襄皇帝神武長子魏中興元年為渤海王世子

二年加侍中開府儀同三司尚孝靜帝妹馮翊長公主
天平元年加使持節尚書令大行臺并州刺史三年入
朝輔政加領左右京畿大都督興和二年加大將軍領
中書監武定四年十一月神武西討不豫班師帝馳赴
軍所侍衛還晉陽五年正月神武晏駕七月魏帝詔以
帝為使持節大丞相都督中外諸軍錄尚書事大行臺
渤海王八月戊辰文襄啟申神武遺令請減國邑分封
將督各有差辛未朝鄴固辭丞相魏帝詔曰既朝野攸

憑安危所繫不得令遂本懷須有權奪可復前大將軍
餘如故七年七月辛卯遇盜而終文宣受禪追謚為文
襄皇帝廟號太宗

顯宗文宣皇帝神武第二子時天平二年授散騎常侍
驃騎大將軍儀同三司左光祿大夫太原郡開國公武
定元年加侍中二年轉尚書左僕射領軍將軍五年授
尚書令中書監京畿大都督武定七年七月文襄遇害
帝乃走晉陽親總庶政十一月梁齊州刺史茅靈斌德

州刺史劉領隊南豫州刺史皇甫昏等並以州內屬八年正月魏帝詔進帝位使持節丞相都督中外諸軍錄尚書事大行臺齊郡王食邑一萬戶三月進封齊王五月進相國總百揆封冀州之渤海長樂安德武邑瀛州之河間高陽之章武定州之中山常山博陵十郡邑二十萬戶加九錫殊禮齊王如故遣兼太尉彭城王韶司空潘相樂冊命曰於戲敬聽朕命夫唯天為大列星宿而垂象謂地蓋厚疏川嶽以阜物所以四時代序萬類

駢羅庶品得性羣形不彫然則皇王統歷深視高居拱
默垂衣寄成師相此則夏伯殷尹竭其股肱周成漢昭
無為而治也往者天下多難國命如旒則我太廟之業
將墜於地齊獻武王奮迅風雲大濟區域援翼朕躬國
為再造經營庶土以至憂勤及文襄承構愈廣前業康
邦夷難道格穹蒼王縱德應期千齡一出唯幾唯深乃
神乃睿大崇霸德實廣相猷雖冥功妙實藐絕言象標
聲示迹典禮宜宣令申後命其敬虛受王搏風初舉建

撫上地庇民立政時雨滂流下識廉恥仁加水陸移風
易俗自齊變魯此王之功也仍攝天臺總叅戎律策出
若神威行朔土引弓竄跡松塞無烟此又王之功也逮
光統前緒持衡匡合華戎混一風海調夷日月光華天
地清晏聲接響隨無思不偃此又王之功也逝矣炎方
逋違正朔懷文曜武授畧申規淮楚連城漼然桑落此
又王之功也關峴襟帶跨躡蕭條腸胃之地嶽主鳩跼
偏師繞指渙同冰散此又王之功也晉熙之所險薄江

雷迫隔聲教速方未改命將鞠旅覆其巢穴威畧風騰
傾懾南海此又王之功也羣蠻跋扈世絕南疆搖蕩邊
陲亟為塵梗懷德畏威向風請順傾圻盡落其至如雲
此又王之功也胡人別種延蔓山谷酋渠萬族廣袤千
里憑險不恭恣其桀黠有樂淳風相携叩款粟帛之調
王府充積此又王之功也茫茫涉海世敵諸華風行鳥
逝倏來忽往既飲醇醪附同膠漆醺表委物奇獸銜尾
此又王之功也秦川尚阻作我仇讎爰挹椒蘭飛書請

好天動其衷辭卑禮厚區宇又寧遐邇畢至此又王之
功也江陰告禍民無適歸蕭宗子弟尚想投庇如鳥還
山猶川赴海荆江十部俄而獻割乘此會也將混朱方
此又王之功也天平地成率土咸茂禎符顯見史不停
筆既連百木兼呈九尾素過秦雀蒼比周烏此又王之
功也搜揚管庫衣冠獲序禮云樂云銷沉俱振輕徭徹
賦矜獄寬刑大信外彰深仁遠洽此又王之功也王有
安天下之大勲加以表光明之盛德宣贊洪猷以左右

朕言昔旦奭外分毛畢入佐出內之任王宜總之人謀
鬼謀兩儀協契錫命之行義申公道以王踐律蹈禮軌
物蒼生圓首安志率心歸道是以錫王大輅戎輅各一
玄牡二駟王深重民天唯本是務衣食之用榮辱所繇
是用錫王袞冕之服赤舄副焉王深廣惠和易調風化
神祇且格功德可象是用錫王軒懸之樂六佾之舞王
風聲振赫九域咸綏遠人率俾奔走委盡是用錫王朱
戶以居王求賢選衆草萊以盡陳力就列罔非其人是

用錫王納陛以登王英圖猛槩抑揚千品毅然之節肅
是非違是用錫王虎賁之士三百人王興亡所繫制極
幽顯糾行天討罪人斯得是用錫王鈇鉞各一王鷹揚
豹變實扶下土狼顧鴟張罔不彈射是用錫王彤弓一
彤矢百盧弓十盧矢千王孝弟之至通於神明率民興
行咸達區宇是用錫王鉅鬯一卣珪瓚副焉往欽哉其
祇順往冊保弼皇家用終爾休德對揚我太祖之顯命
又詔以齊國大妃為王太后戊子遂受魏帝禪

冊府元龜卷一百八十六